

Ceremonia simpel di conmemora ayera

“Mas victima Antiyano den Segunda Guerra Mundial”



ORANJESTAD — Tin mas victima cu a cay durante Segunda Guerra Mundial na e islanan di Antias. Esaki Jos Rozenburg ta bisa den su buki ‘De Antillen in de Tweede Wereldoorlog’ cu ta sali awe y ta conta di ocho aña di investigacion.

Riba e monumentonan na e islanan Hulandes Caribense, pues tambe Aruba, ta para cu 129 Antiyano a muri durante e guerra. Pero sr. Rozenburg a descubri cu ta falta number di 37 victima Antiyano. Riba e website www.antillesatwar.com por haya tur e nombernan. No tabata facil pa haya e informacion, segun sr. Rozenburg, pasobra no taba-

ta mucho conoci di victimanan Antiyano y e archivonan concerni a keda cera pa hopi aña. Di e 37 victimanan tabata conoci nada nada si nan realmente tabata victima di e Segunda Guerra Mundial, segun e autor. Den su buki Rozenburg ta conta entre otro di e atakenan di submarino Aleman riba e refinerianan di Corsou y Aruba. E tambe ta menciona e gobernador Wouters na Corsou cu a nenga hudionan Europeo cua a huy, di drenta. Diaranson e autor ta presenta su buki na Aruba y for di fin di mei por cumpr’e aki y riba e otro islanan.

Conmemoracion

Cu un ceremonia solemne, simpel y bunita a conmemora ayera esnan den Reino cu a perde nan bida durante Segunda Guerra Mundial. Mescos cu cada aña a pone corona di flor na monumento di Segunda Guerra Mundial na Adriaan Laclé Boulevard. Atardi tabata yegando su final ora cu tur cos tabata cla pa cuminsa. Militarnan den trahe ceremonial a marcha den un desfile for di e estatua di e schutter te na e monumento na unda e ceremonia a tuma luga. Hobennan di gruponan di scout tabata para den formacion, mescos cu miembronan di comision di ex-Schutter amurada, cu a organisa e ceremonia conhuntamente cu militarnan Hulandes.

Mas importante ainda, e veteranonan di Schutterij a yega. Casi tur ta den edad sumamente avansa, y esaki tabata nan dia. ceremonia aki esencialmente ta pa nan ya cu nan ta e unico link bibo cu nos tin ainda cu e epoca di Segunda Guerra Mundial, den cual Aruba a hunga un rol crucial den produccion y distribucion di combustibel pa e Aliadonan.

Marcha keto

Cu un marcha keto guia pa

gubernador Fredis Refunjol, prome minister, presidente di parlamento, secretaria di Consejo di Minister, representantenan di VNO y miembronan di Marina a cana for di e monumento di Schutterij bin pazuid pa e monumento di Segunda Guerra Mundial. Despues di un introduccion pa maestra di ceremonia Giana Quandt-Martiena, e vlootpredikant di marinierskazerne na Savaneta a haci un oracion, enfocando riba esnan cu a y ta wordo persigui den conflictonan rond mundo y gradiciendo pa e estado di derecho den cual nos ta bibando na unda tin libertad di expresion. Despues cu gobernador Refunjol a pone un corona di flor, a tuma e tradicional 2 minuut di silencio pa tur esnan cu a cay den gueranan rond mundo. Despues di e momento meditativo aki, a toca e ‘Wilhelmus’ y ‘Aruba Dushi Tera’ cu fluit y bateria.

Discurso cortico di prome minister

A toca prome minister Mike Eman pa duna su discurso. Kibando cu custumber, e prome mandatario a tene un discurso cortico den cual el a enfoka riba e espiritu di sacrificio pa un bon mas grandi. Ela menciona e Arubano Boy

Ecury, cu a pesar di a wordo discrimina a join e resistencia y a lucha contra e ocupadornan Aleman. El a mustra riba hecho cu guerra ta saca e pio caracteristicanan di hende, pero tin biaha tambe esunnan mas noble.

E prome minister a termina su discurso cu un ponencia cu kizas tin resonancia no solamente pa loke ta Segunda Guerra Mundial. “Nos no mester sinta warda riba gradicimento di otro. No semper esaki ta wordo aprecia. Bo por ta solidario y duna muestra di vision y di caracter decisivo pa hunto cana e caminda pa un miho mundo pa tur hende. Algo cu no semper ta wordo reconoci ni tampoco brasa. Pero, e hende no mester ta bon pasobra e kier wordo gradici, ni pasobra e kier wordo brasa y haya reconocimento. E hende ta bon pasobra cu Dios a traha nos pa ta bon hende”.

Despues di su discurso, prome minister Eman hunto cu secretaria di Consejo di Minister, Nicole Hoevertsz, a pone un corona di flor, mescos cu algun Schutter y famia di esnan cu tabata Schutter den guerra na Aruba. E hobenan di scout a pone flor na e monumento. □